

Date – 12/01/2025

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Mizoram sorkarin nikum September Ni 1 atanga petrol leh diesel man atanga chhiah a tihpun atangin, December thla thleng khan Road Maintenance cess leh Social Infrastructure & Services cess atangin Cheng Nuai 452, Sing 3, Sang 2, 600 a hmu tawh.
2. Khawzawl District Sialhawk khuaa Lakhuihthei chingtute chuan nikum khan Lakhuihthei Quintal 13,000 vel an thar chhuak.
3. January ni 11, Inrinni kha Mizoram Presbyterian Kohhran chuan an Din Tan Ni atan an hmang a, Tualchhung Kohhranten an remchan dan angin chhun lamah emaw zan lamah emaw hun an hmang.
4. Prime Minister Narendra Modi chuan Viksit Bharat Young Leaders Dialogue hi ram hmasawna kawngah thalai te ke pen tir tura hmalakna tha tak a nih thu a sawi.

<><><>

### CESS

Mizoram sorkarin nikum September Ni 1 atanga petrol leh diesel man atanga chhiah a tihpun atangin, December thla thleng khan Road Maintenance cess leh Social Infrastructure & Services cess atangin Cheng Nuai 452, Sing 3, Sang 2, 600 a hmu tawh.

Taxation, Finance department chuan nikum August ni 30-a hriattirna a tihchhuah-ah petrol leh diesel-ah litre khat zelah Social Infrastructure & Services cess Cheng 2 leh Road Maintenance cess Cheng 2 lak a nih tur thu a chhuah hnuahn chhiah hi lak tan a ni a, October thla chung hian Cheng Nuai 16,48,352 hmuh a ni a, November thla bik ah cheng Nuai 426,50,312 a ni a, November thlaa chhiah lut a tam chhan hi October thla khan khawl lamah fel lo a awm avangin petrol dealer ten pawisa an thun theih loh avang a nih thu Taxation, Finance Department lam hotute chuan an sawi a ni. December thla khan Road Maintenance Cess leh Social Infrastructure & Services cess atangin Nuai 9, Sing 3 Sang 3,936 hmuh a ni.

Tuialhthei mana chhiah lak hi sorkar chuan Road Maintenance cess chu kawng atan liau liau hman a nih tur thu an lo sawi tawh a, social infrastructure & Services cess chu zirna in tihchangtlunna atan te, hriselna kaihnawih hman atan te, skill development leh hmeichhia te chawikanna atana hman tur a nih thu a sawi baw a ni.

<><><>

### SIALHAWK PINEAPPLE

Khawzawl District Sialhawk khuaa Lakhuihthei chingtute chuan nikum khan Lakhuihthei Quintal 13,000 vel an thar chhuak a, an lakhuihthei thar chhuah atang hian Quintal 9,000 vel hralh chhuakin Quintal 4,000 vel chu hralhna tur an hriat loh avangin a tawihral a ni.

Sialhawk khuaah hian kum 2005 vel atang khan Lakhuihthei hi chin tan a ni a, kum 2016 khan khawtlang angin an buaipui tan a, tunah hian chhungkaw 250 velin an ching mek a. Nikum lamah hralhna lamah an buai bakah tuna an thar chhuah lai mek te pawh a hralhna turah buaina an tawh chhoh zel avangin chhungkaw engemaw zat chuan kuminah hian Lakhuihthei chin hi bansan an rilruk tih an sawi a ni. Kan corr report lo ngaithla ang.

VC

(Sialhawk khuaah hian Lakhuihthei ching hi chhungkaw 250 vel an awm a. Lakhuihthei chingtute hnen atanga thu dawn danin, nikum hmasa 2023 khan Lakhuihthei hralhna tur Mizoram Sawrkarin a ngaihtuahpui avangin Lakhuihthei Quintal 12,000 vel an hralh chhuak thei a. Nikum 2024 khan Sawrkar lam atangin a hralh chhuahna kawngah puihna an hmuh loh avangin anmahni in an theih angin Market an inzawn a, Quintal 9,000 vel hralhna tur an hmuh laiin Quintal 4,000 vel chu hralhna tur an hriat loh avangin a tawihral a ni. Lakhuihthei hi chawh rualin Kg.1 Rs.10/- in an hralh ang a ni a, nikum khan Rs. 90,00,000/- vel an lei laiin Rs.40, 00,000/- man vel a tawihral thung a ni.)

<><><>

## PRESBYTERIAN

Nimin January ni 11, Inrinni kha Mizoram Presbyterian Kohhran chuan an Din Tan Ni atan an hmang a, Tualchhung Kohhranten an remchan dan angin chhun lamah emaw zan lamah emaw hun an hmang.

Kohhran tam zawk chuan zan lamah he hun hi an hmang a. Kuminah hian chhun leh zan atan thupui zir tur ruahman a ni a, chhun lamah 'Chanchin Tha leh Kohhran' tih zir niin, zan lamah 'Hei leh chen hi Lalpan min pui a ni' tih chu zir ho a ni thung.

Kum 2014 Synod Inkhawmpui chuan "An Kohhran din kum chu kum 1894 January ni 11 a ni e," tiin a rel a. Kum 2016 Synod Inkhawmpui chuan "Mizoram Presbyterian Kohhran din tan ni chu Synod Ni pawimawhah telh ve ni rawh se" tiin a rel leh a, Synod Executive Committee (SEC)-in bawhzuiin "Mizoram Presbyterian Kohhran Din Tan Ni January ni 11 hi kum 2018 atangin hman tan niin - Synod Calendar-ah telh a ni a, Synod Holiday-ah telh ni bawk.

(Voice Cast)

*(Mizoram Synod Website-in a tarlan dan chuan, nikum April ni 18-a inchhiarna an neih danin Mizoram Presbyterian Kohhranah hian member 6,28,719 an awm mek a, chung zinga 3,04,304 chu mipa niin, hmeichhia 3,24,415 an awm bawk. Mizoram Synod hnuaiia Department hrang hrangah thawktu mi 3,705 an awm mek bawk a ni.)*

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

**MISTIC**

Mizoram Science, Technology & Innovation Council Governing Body chu an chairman Pu Lalduhoma, Chief Minister hovin CM Conference Room ah an thukhawm a.

Meeting hian Mizoram state Intellectual Property Right Policy te, Science, Technology & Innovation Policy chungchang te leh an inrelbawlina thil pawimawh dang te a sawiho a ni.

Chief Scientific Officer, Member Secretary, (MISTIC)Pu H. Lalsawmliana, chuan tun hnaia an hmasawna leh hmachhawp an neih tlangpuite tarlangin MISTIC hian Research & Development (R&D) hmalakna hnuaiyah nikum khan Lungleiah Science Centre leh Planetarium an hawng a, Khawzawla KVK hmunah Solar Cold Storage, Ton 10 dah theihna, Aizawl atanga control theih an bun a, 4-Color Web Offset Press, Phunchawngah hawn mai theihin an peih tawh a. Mizoram Biotechnology Centre, MINECO ah an sa mek a, Selinga Food Testing Lab tihchangtlun hna an thawk bawk a ni.

Innovation Facility Centre hmalaknain Innovation Promotion hmun engemawzatah an kalpui a. Workshop te, training leh exhibition te, Innovator meet te an buatsaih a. Innovator te an tanpui a, intihsiakna te leh Industry tlawhna hun te pawh an buatsaih thin tih a tarlang a, Patent Information Centre hnuaiyah an hmalakna atangin Intellectual Property Right; patent 5, trademark 20, geographical indications 5, copyright 9 leh design 1 pawmsak an ni tawh a. Climate Change Knowledge Management hmalakna te, Technology deployment te, Science lam chawi larna te, Institution leh Human capacity building lam hmalakna te an kalpui bawk.

<><><>

**KHAWHAI PHC**

Ramchhunga sorkar damdawi in tha bik thlan zingah Khawhai Primary Health Centre an tling thar.

National Health Mission, Health & Family Welfare Department atanga thu dawn danin, India rama sorkar damdawi in tha bik tehna, National Quality Assurance Standards-ah Khawhai PHC te chu an tling a, a tehnaah za zela 90.13% an hmu a, Heti hian Mizorama sorkar damdawi in 14 te chu NQAS national certificate nei an ni tawh a. Tunah hian sorkar damdawi in 15-in state level paltrang tawhin national certificate an dil mek bawk a ni.

Health Minister, Pi Lalrinpui chuan, ramchhunga damdawi in tha bik thlan chhuah zingah Mizorama damdawi in an awm belh zel chu Mizoram tan mellung pawimawh tak a nih thu leh thawktu zawng zawng te thawhrimna leh taimakna chhuanawm a tih thu sawiin, an hmasawna chu sorkar damdawi in pantu damlote chu a chhawr tangkai bertu tur an nih thu a sawi.

Siaha District Hospital, East Lungdar PHC leh Phuaibuang PHC te chu tunhnai mai khan an tling thar a. Siaha District Hospital hian damdawi in puma NQAS an hmuh bakah hian India rama nau neihna hmun tha bik leh inzaina hmun tha bik tehna LaQshya certificate an hmu tel a, LaQshya bikah hian Platinum Certificate an dawng pha a ni. Hemi bakah hian naupang damlo enkawlina hmun tha bik tehna, MusQan-ah an tling a, Lawngtlai District Hospital pawh hian LaQshya certificate an hmu tel bawk.

A hmain Aibawk PHC, Thingsulthliah PHC, Civil Hospital Aizawl, Civil Hospital Lunglei, Champhai District Hospital, ITI UPHC, Chawlhmun UPHC, Haulawng PHC leh Sialhawk PHC te an lo tling tawh bawk.

<><><>

**Prime Minister on Viksit Bharat**

Prime Minister Narendra Modi chuan Viksit Bharat Young Leaders Dialogue hi ram hmasawna kawngah thalai te ke pen tir tura hmalakna tha tak a nih thu a sawi.

PM Modi hian nimin khan Minister of State for Youth Affairs and Sports, Raksha Khadse-i'n National Youth Festival 2025 leh Viksit Bharat Young Leaders Dialogue chungchanga thu a ziah chu a pholang a. He programme hian Viksit Bharat tihhlawhtlinna tura thalai te chakna, thil siam chhuah thiamna leh hruaitu nihna te koh chhuah a tum thu a sawi bawk.

Vawiin hian National Youth Day pualin Prime Minister Modi chuan New Delhi-a Bharat Mandapam-ah Viksit Bharat Young Leaders Dialogue 2025-ah hun a hmang dawn a. Ram chhung hmun hrang hrang atanga hruaitu thalai sangthum te hma-ah thu a sawi dawn a ni.

Heng thalai sangthum te hi Viksit Bharat Challenge kaltlangin ramchhung hmun hrang hrang atangin thlan chhuah an ni. He hunah hian thalai te hian Viksit Bharat tana an hmahlir chungchang an ngaihnan leh an hmahlir te an pholang dawn a ni.

<><><>